

volatui garrituique, & puerilibus succubuisse fallaciis: Vno quidem nos consolari possumus, quod qui superiorem genuimus, ad alienas transmisimus, hunc nouum ab aliis genitum, adoptauimus, imitandoque nostrum fecimus. Apud Græcos namque multo ante urbem cōditam augures floruerant, tantoque fuerunt in honore, ut Calchas petentibus Ilion Graiis, numerosissimæ classis præfectus memoretur, ob unam auspicij disciplinam, in ea enim excellebat, in rebus aliis multis inferior. Amphiaraus vero, & Tyresias tam illustres eodem artificio feruntur, ut primum pro Deo colerent, & tellus quæ illum absorbuerat pro oraculis adjretur: Secundus non modò viuis hominibus præferretur, sed defunctis etiam (Homero dicente) solum apud inferos Tyresiam sapere, vagari reliquos umbrarum more: Nec prius præterea nostri Reges augurio docti fuerunt, regnabant prius in Gracia Mopsus & Amphilotas famosi augures, denique ut est apud Ciceronem, omnino apud veteres, qui rerum potiebantur iidem auguria tenebant, affertque rationem: Ut enim, inquit, sapere, sic diuinare regale dicebant.